

Канон святителю Николаю, глас 2-й

**Канон святителю и чудотворцу Николаю,
архиепископу Мир Ликийских**

Канон первый из службы 6/19 декабря

Егоже краестрочие: Тебе, Николае, воспеваю
божественное пение - Творение Феофаново

Глас 2-й:

Песнь 1

Ирмос: Во глубине постла иногда фараонистское
всевоинство преоруженная сила, воплощенное же Слово
всезлобный грех потребило есть: Препрославленный
Господь, славно бо прославился.

Припев: Святителю отче Николае, моли Бога о нас.

Венценосец престолу Христову, премудре Николае,
предстоя со Ангельскими воинствы, просвещение ми
даруй, озаряющее души моя омрачение, яко да
восхваляю радуясь твою всеблаженне память (дважды)

Слава, И ныне: Сравнится желание ми вложив змий
вселукавый, Содетелю, яко пленника восхити, Тобою же
Всечистая, воззван бых, обожився истиннейше: Ты бо, о
Богомати, мене Обожившаго родила еси.

Катавасия: Моли Бога о нас, святителю отче Николае,
яко мы усердно к тебе прибегаем, скорому помощнику и
молитвеннику о душах наших.

** или иная положенная в читаемое время катавасия*

Песнь 3

Ирмос: Процвела есть пустыня яко крин, Господи,
языческая неплодящая церковь, пришествием Твоим, в
нейже утвердися мое сердце.

Припев: Святителю отче Николае, моли Бога о нас.

Николае блаженне, Владыки искренний ученик ты быв,
спасаеши к тебе притекающие от лютых бед и смерти
горькия. (дважды)

Слава: Очисти рабы Твоя, грехов оставление яко Благ
даруя, Николаа Твоего угодника, яже к Тебе
ходатайствы, Многомилостиве.

И ныне: Утоли смущение души моея, Пречистая, и жизнь окорми, Всесвятая, Бога Рождшая, в Немже утвердися сердце мое.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Господи, помилуй (трижды).

Седален, глас 8:

Возшед на высоту добродетелей, Божественными оттуду отче озарився сиянии чудес, пресветел воистину явился еси миру пастырь, нам в напастех сый престатель непобедимъ: темже преславно врага победив, лжу отгнал еси и человеки спасл еси от смерти, Николае. Моли Христа Бога, грехов оставление даровати, чтущим любовию святую память твою.

Слава, и ныне.

Яко Деву и Едину в женах Тя без семени рождшую Бога плотию, вси ублажаем роди человечести: огонь бо вселися в Тя Божества, и яко младенца доиши Зиждителя и Господа. Тем ангельский и человеческий род достойно славим Пресвятое Рождество Твое, и согласно вопием Ти: моли Христа Бога грехов оставление даровати, покланяющимся верою Пресвятому Рождеству Твоему.

Песнь 4

Ирмос: Пришел еси от Девы, не ходатай, ни ангел, но Сам, Господи, воплощься, и спасл еси всего мя человека, тем зову Ти: слава силе Твоей, Господи.

Припев: Святителю отче Николае, моли Бога о нас.

Приблизився чисте зарям духовным, светоносец был еси, мира просвещающа концы, всем предстательствуя, и вся спасая верою к тебе притекающия.

Избавляя от смерти, яко явился еси первее Николае, юноши преподобне: тако и ныне мя спаси от всякаго обстояния, и напастей и бед, всеблаженне.

Слава: Облистал еси добродетелей сияньми всеблаженне, подражатель всеизряднейший твоего

Владыки быв, спасаеши же призываемъ, благоговением и любовию тя славящия.

И ныне: Найде на Тя Владыка твари Воплощаемъ, и спасая яко Благоутробен всего мя человека: темже вернии Богородицу Тя славим.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Песнь 5

Ирмос: Просвещение во тьме лежащих, спасение отчаянных, Христе, Спасе мой, к Тебе утреннюю, Царю мира, просвети мя сиянием Твоим: иного бо разве Тебе Бога не знаю.

Припев: Святителю отче Николае, моли Бога о нас.

Боголепным житием, треблаженне, просвещаемъ, осужденныя неправедным изречением умрети, представ, избавил еси, Владыце Христу зовущия: иного бо разве Тебе Бога не знаем. (дважды)

Слава: На Небесех присносущную славу ныне зря, и неизглаголанная и Божественная зари светлейшими наслаждаяся сиянии, покрый мя предстательством твоим, преподобне, угодниче Христов вселенне.

И ныне: Да Твой взыщещи образ, погребенный страстьми, Спасе, небесных утаився сил, воплощься из Девы, явился еси Тебе зовущим: иного разве Тебе Бога не знаем.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Песнь 6

Ирмос: В бездне греховней валяся, неизследную милосердия Твоего призываю бездну, от тли, Боже, мя возведи.

Припев: Святителю отче Николае, моли Бога о нас.

Иже победы Николае, венец на твоём версе достойно положи: яко победитель убо изряднейший, ты призывающия спаси (дважды)

Слава: Умерщвлена мя, блаженне, прегрешеньми, и страстей треволеньми погружаема, явився спаси ко пристанищу Божественныя воли.

И ныне: На Тя надежды возложих Мати Приснодево, спасения моего, и Тя Предстательницу полагаю жизни, тверду же и непоколебиму.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Господи, помилуй (трижды). Слава, и ныне:

Кондак, глас 3.

В Мирех, святе, священнодействитель показался еси, Христово бо, преподобне, Евангелие исполнив, положил еси душу твою о людех твоих и спасл еси неповинныя от смерти. Сего ради освятился еси, яко великий таинник Божия благодати.

Икос

Воспоим ныне святителя песньми, мирским людем пастыря и учителя, да молитвами его просветимся: се бо явился чист весь, нетленен духом, Христу принося жертву непорочну, чисту, Богу благоприятну, яко святитель, очищен и душею и телом, темже сый истинно Церкви предстатель и поборник сея, яко великий таинник Божия благодати.

Песнь 7

Ирмос: Образу златому на поле Деире служиму, трие Твои отроцы небрегоша безбожнаго веления, посреде же огня ввержени, орошаеми, пояху: благословен еси, Боже отец наших.

Припев: Святителю отче Николае, моли Бога о нас.

Острому искушению впадох, и люте пострекаемь, и ко вратом ада приближихся, скорбьми поражаемь, спаси мя молитвами твоими, блаженне, и возстави поюща: благословен еси Боже отец наших (дважды)

Слава: Незаходимаго света Невещественными лучами облистаеть, сущия во тьме скорбей озлобленныя исхити,

и к просвещению веселия настави поющия: благословен еси Боже отец наших.

И ныне: Моли Христа, Сына Твоего и Бога, Дево Богородительнице, проданныя лютыми прегрешеньми и лестьми змииными, Кровию Его честною избавитися поющим: благословен еси Боже отец наших.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Песнь 8

Ирмос: В пещь огненну ко отроком еврейским снизшедшаго, и пламень в росу преложшаго Бога, пойте, дела, яко Господа, и превозносите во вся веки.

Припев: Святителю отче Николае, моли Бога о нас.

Яко благ и сострадателен, во глубине напастей люте содержимыя свободы, блаженне Николае, от содержащих лютых разрешение подая молитвами твоими, яже ко Спасу Христу, священнотаинниче (дважды)

Слава: Тайновождь сущих паче ума, святых служитель и Небесных сый богомудре, архиерей же верен, прегрешений оставление проси от Спаса нашего, священноявленне.

И ныне: Изнемогает мой ныне ум, во глубину впад безчестия, яко отвсяду различными объят есмь злыми: но Ты, Дево, исцели, безстрастия светом одевающи.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.

Песнь 9

Ирмос: Безначальна Родителя Сын, Бог и Господь, воплощься от Девы нам явися, помраченныя просветити, собрати расточенныя, Тем Всепетую Богородицу величаем.

Припев: Святителю отче Николае, моли Бога о нас.

Свещами благодати Богомудре просвещаемь, и светильник благочестия яве был еси, сущия в напастех спасаеши, и сущия во глубине морстей избавляеши, и питаеши алчущия преславно, всеблаженне (дважды)

Слава: Иже в раи сладости ныне водворяяся, и неизреченную славу ясно зря, от Небесных круг певцы твоя назираеши, от страстей избавляя, богоносе всеблаженне.

И ныне: Премудрость, и Силу, и Слово Ипостасное Отчее, Богомати Чистая родила еси, от Твоих Пречистых кровей Свой Храм Приимшую, и сему по соединению соединившуюся нераздельно.

Катавасия: Моли Бога о нас, святителю отче Николае, яко мы усердно к тебе прибегаем, скорому помощнику и молитвеннику о душах наших.